

HEBREOS

Manami musyantsitsu cay libruta pï escribishgantapis. Waquin runacuna yarpan Bernabé escribishganta (Hechos 4.36; 13.1–5); waquin runacunanami yarpan Apolos escribishganta (Hechos 18.24,25; 1 Corintios 1.12; 3.4–8; 3.22,23). Waquincunanimi yarpapácun maygalanpis cay libruta escribishganta. Maygan carpis cay libruta escribergan Jesucristuta chasquicog Israel runacunapagmi.

Canan tanyacushun cay libruta liyir imata yachacunantsipag cashgantapis.

- 1) Cay libruta liyirmi yachacushun Jesucristo angilcunapita más munayniyog cashganta (1.4–2.18), Moisespita más munayniyog cashganta (3.1–4.13) y mandag cüracunapitapis más munayniyog cashganta (4.14–5.10; 7.1–28).
- 2) Cay libruta liyirmi yachacushun Tayta Diosnintsi salvamánantsipag mushog conträtuta rurashganta (8.1–13).
- 3) Cay libruta liyirmi yachacushun uywacunata altarcho rupatsinantsipa trucanga Jesucristuta chasquicuptintsi Tayta Diosnintsi perdonamánantsipag cashganta (9.1–10.18).
- 4) Cay libruta liyirmi yachacushun Jesucristuman yäracushgantsipita guepaman mana cutinantsipag cashganta (5.11–6.20; 10.19–39).
- 5) Cay libruta liyirmi yachacushun imanog nacarpis Tayta Diosman imaypis yäracunantsipag cashganta (11.1–12.29). Más yachatsicuycunapis cay librucho escribirayanmi (13.1–25).

Lapanpitapis más munayniyog Jesucristo cashgan

1¹ Naupataga Tayta Diosnintsimi profëtancunata cachargan Israel mayintsita wilacuyninta tucuynogpa wilapänanpag. ² Cananmi itsanga Diospa tsurin Jesucristuna shamushga wilacuyninta wilapämánantsipag. Paywanmi Tayta Diosnintsi camargan cay patsata y jana patsatapis. Nircurmi payta churashga lapantapis munaynincho tsararänanpag. ³ Jesucristoga Diosnintsimi caycan. Lapan camashgancunatapis

munaynincho tsararaptinmi cananyagpis caycanrag. Jutsantsipita perdonashga canantsipag cruzcho wanurcurmi gloriaman cutergan. Cananga Tayta Diospa derëcha cag naupancho jamarashpanmi lapanpagpis munayniyog caycan.

Jesucristo angilcunapitapis más munayniyog cashgan

^{4,5} Tsaynog caycaptenga Tayta Diospa tsurin Jesucristoga lapan angilcunapitapis más munayniyogmi caycan. Tsaymi Jesucristuta Tayta Diosnintsi caynog nergan:

“Gamga cuyay tsurëmi canqui.
Tsaymi gamta churä lapanta
mandanayquipag.”^a

Tsaynogلامي mastapis Tayta Diosnintsi nergan:

“Nogaga gampa taytayquimi cä.
Gammi nogapa tsurë caycan-
qui.”^b

Manami maygan angiltapis tsaynog nergantsu.

⁶ Tsaynogلامي tsurin Jesucristo gloriaman cutiptin Tayta Diosnintsi caynog nergan: “Lapan angilcunapis payta adoratsun.”^c

⁷ Angilcunapäga Tayta Diosnintsi palabranchu caynogmi niycan:

“Angilcunata ticsatsë wayraman carpis o ninaman carpis mandashgäta rurapäcunanpagmi.”^d

⁸ Tsurin Jesucristupagnami itsanga caynog niycan:

“Gamga Dios carmi imayyagpis mandag caycanqui.
Gamga pitapis mana jananpaypami juzganquipag.

⁹ Gamga munanqui lapan runacuna noga munashgänog alilata rurar cawanantami.

Tsaymi taytayqui car gamta churashcä lapanpagpis munayniyog canayquipag.

Gam munayniyog cashgayquinöga manami pipis munayniyog cantsu.

Tsaymi gam imaypis cushishga caycanqui.”^e

¹⁰ Tsaynogpis Jesucristo cay patsata y jana patsata camashga captinmi Tayta Diospa palabranchu caynog niycan:

“Lapanpag munayniyog carmi cay patsata y jana patsatapis camashcanqui, Tayta.

^{11,12} Lapan camashgayquicunaga röpanog ushacagلامي caycan. Röpana runa trucacushgan-nogmi gampis lapan camashgayquicunata trucatsinquipag. Lapan ushacaptinpis gamga imayyagpis caycanqui-pagmi.”^f

¹³ Manami maygan angilcunatapis Tayta Diosnintsi caynog nishgatsu: “Jamacamuy derëcha cag nau-päman lapan contrayquita vincinäyag.”^g

¹⁴ Angilcunaga Tayta Diosnintsi mandashganta ruranalanpagmi carcaycan. Paycunatami Tayta Diosnintsi cachamun Jesucristuta chasquicocunata cuidananpag.

Jesucristupa wilacuyninta cäsucunantsipag tanyatsicuy

2¹⁻⁴ Angilcunapitapis Jesucristo más munayniyog caycaptenga paypa wilacuyninta shumag cäsucushun. Quiquinmi cay patsaman shamushga ali wilacuyninta tanyatsinanpag. Nircurnami apostolcuna wilacorgan nogantsipis musyanantsipag. Wilacuynin rasunpa cashganta musyantsi apostolcuna milagrucunata rurananpag Tayta Dios yanapartinmi. Tsaynogpis wilacuynin rasunpa cashganta musyantsi chasquicocunata Santu Espiritu tucuy-nogpa yanapartinmi. Tsaynog caycaptenga shumag cäsucushun tsay wilacuyninta. Tsay wilacuyninta mana cäsucuptintsega waran waranlanmi shonguntsi chucruyangapag.

^a 1.4,5 Salmo 2.7. ^b 1.4,5 2 Samuel 7.14. ^c 1.6 Deuteronomio 32.43. ^d 1.7 Salmo 104.4. ^e 1.9 Salmo 45.6-7. ^f 1.11,12 Salmo 102.25-27. ^g 1.13 Salmo 110.1.

Angilcuna apamushgan mandamien-tuta^h mana cäsucog runacunata Tayta Dios mana cuyapaypa castigaycarga ¡pasaypami castigamäshun quiquinpa tsurin apamushgan wilacuyninta chasquicurcur mana cäsucuptintsega!

**Jesucristo nogantsinog runa
cashpan cuyapämashgantsi**

⁵ Tayta Diosga manami angilcunapa maquinmantsu churashga imaycata-pis munaynincho tsararänanpag, sinöga Jesucristupa maquinmanmi. Payga cay patsacho runanog yurirpis angilcunapita más munayniyogmi caycan. ⁶ Tsaymi Tayta Diosnintsipa palabrancho caynog niycan:

“Runacunata cuyashgayquipi-tami gamta alabä, Tayta Dios.

⁷ Cay patsacho cawashganyag-lami angilcunapita menos munayniyog cananpag runata churashcanqui.

⁸ Tsaynog captinpis cay patsacho lapan camashgayquicunata munaynincho tsararänan-pagmi runata churashcanqui.”ⁱ

Tayta Diospa palabrancho tsaynog niptinpis Diosnintsi lapan camash-gancunata runacuna manaragmi munaynincho tsararanragtsu. ⁹ Jesucristumi itsanga Tayta Diospa derë-cha cag naupancho jamaraycan lapantapis mandananpag. Jesucristoga cay patsacho yurishga carpis cananga gloriacho angilcunapitapis más munayniyogmi caycan. Tsaynog munayniyog cananpag Tayta Diosnintsi payta churashga lapan runacuna-raycu cruzcho wanushganpitami.

¹⁰ Tsaynog wanushganpitami payta chasquicogcunata Tayta Diosnintsi lapantapis perdonar salvangapag.

¹¹ Jesucristuta chasquicogcunaga Tayta Diospa wamrancunanami caycan. Tsaymi Jesucristupis, Diospa tsurin car, paycunata mana pengacuyca: “Waugüecuna y panëcunami canqui” niycan. ¹² Tayta Diosnintsipa palabranchöpis caynogmi niycan:

“Wilacuyniquitami wauguëcunata panëcunatapis yachatsishag.

Paycunawan juntacaycurmi gamta alabashayqui.”^j

¹³ Yapaypis caynogmi nin: “Tayta Dioslamanmi imaypis yäracushag.” Mastapis caynogmi niycan: “Caychömi caycä Tayta Diosman yäracogcunawan.”^k

¹⁴ Jesucristoga nogantsinog runala yurircur cruzcho wanushpanmi diabuta vincishga. ¹⁵ Diabluta vincirmi paypa maquincho caycagcunata jorgur salvaycan. Tsaymi wanuyta mantacunantsita diablo munaptinpis Jesucristuman yäracorga wanuytapis ni diablutapis mana mantsacuntsinatsi.

¹⁶ Jesucristoga manami angilcunata yanapananpagtsu shamushga, sinöga Abrahamnog Tayta Diosman yäracogcunata yanapananpagmi. ^{17,18} Yanapamänantsipagmi nogantsinogla cay patsacho runanog yurergan. Nogantsinog runa captinmi paytapis Satanás jutsata ruratsiyta camargan. Tsaymi nogantsitapis Satanás jutsata ruratsiyta camamaptintsi Jesucristo tantyaycäsimantsi payta mana cäsüpänantsipag. Tsaymi cananga Tayta

^h2.1-4 Tsay mandamientucunaga caycan Moisés yachatsishgan mandamientucunami. Tsaypita musyanayquipag liyinqui Hechos 7.53; Gálatas 3.19. ⁱ2.8 Salmo 8.4-6. ^j2.12 Salmo 22.22. ^k2.13 Isaías 8.17-18.

Diospa naupancho cuyapäcog mandag cürantsi caycan. Mandag cürantsi car cruzcho wanorgan jutsantsicunata Tayta Dios perdonamänantsipag.

**Moisespitapis Jesucristo
más munayniyog cashgan**

3¹⁻⁵ Waugui-panicuna, perdonash-gana carmi musyantsi apostolninti y yanapäcog mandag cürantsi Jesucristo gloriaman pushamänantsipag cashganta. Tsaynog caycaptenga tanyacushun Jesucristo Moisespitapis más munayniyog cashganta. Moisespita Jesucristoga más munayniyog caycan Tayta Diosninti lapanpitapis más munayniyog cashgannogmi. Jesucristupis Moisespis Tayta Dios nishgancunata cumpleg captinpis Moisesga wayi sharcatség albañilnoglami cargan. ⁶ Jesucristumi itsanga Tayta Diospa tsurin car wayipa dueñun caycan. Payga nogantsipapis dueñuntsimi caycan payman yäracur nishgancunata imaypis cumpliptintsega.

**Jesucristuta chasquicocuna
Tayta Dios nishgancunata
cäsucunanpag tanyatsishgan**

⁷ Tsaymi Tayta Diosnintsipa palabranhōpis Santu Espiritu caynog niycan:

⁸ “Shonguyquita chucruyätsinayquipa trucanga nishgäcunata canan junag jucla chasquicäriy.

Ama capäcuytsu chunyang jircacho Israel runacuna mana cäsucog cashgannōga.

⁹ Tsaychōmi descontento car paycuna rabianätsimargan chuscuchunca (40) wata milagrucunata rurashgäta ricaycarpis.

¹⁰ Tsaymi pasaypa rabiar caynog nergä:

‘Cay runacunaga nishgäcunata manami cäsucamantsu.

Tsaymi paycunaga jutsata rurallar puricärin.’

¹¹ Mana wiyacog captinmi caynog nergä: ‘Paycunaga promitishgä jamayta manami imaypis tarengatsu.’”^l

¹² Waugui-panicuna, Tayta Diospa palabrancho Santu Espiritu tsaynog niycaptenga gamcunapis shumag tanyacäriy. Cuidädu munayniyog Tayta Dios nishgancunata mana cäsucog capäcunquiman. ¹³ Tsaynog captenga cawashgayquiyag lapayquipsis waran waran shacyätsinacäriy Tayta Dios munashgannog cawapäcunayquipag. Tsaynogpami shonguyqui mana chucruyangapagtsu.

¹⁴ Wanunantsiyag Jesucristuman yäracur pay munashgannog cawashpantsimi paypa naupanman chaya-shunpag. Tsaychōmi Jesucristo herenciata chasquishgannog nogantsipis herenciata chasquishunpag.

¹⁵ Tsaynog cananpag caycaptenga ama gongäshuntsu Tayta Diosnintsipa palabrancho caynog nishganta: “Shonguyquita chucruyätsinayquipa trucanga Tayta Dios nishushgayquita canan junag jucla chasquicäriy.

Ama capäcuytsu unay Israel runacuna Tayta Diosta mana cäsucog cashgannōga.”^m

¹⁶ Tsay mana cäsucog runacunaga Moisés jorgamushgan Israel runacunami cargan. ¹⁷ Egiptupita jorgamurpis mana cäsucog cashganpitami chuscuchunca (40) wata Tayta Diosninti paycunawan rabiashga cargan.

^l 3.11 Salmo 95.7–11. ^m 3.15 Salmo 95.7–8.

Tsaynog rabiashpanmi tsay mana cäsucog runacunata chunyang jircacho ushacätsergan. ^{18,19} Canaán nacionman yaycatsinanpag promitirpis mana cäsucog Israel runacunataga manami yaycatsishgatsu.

Tayta Diosnintsi promitishgan jamayta tarinantsipag cashgan

4 ¹ Unay Israel runacunata Canaán nacionman yaycatsinanpag promitishgannoglami nogantsitapis Tayta Diosnintsi promitiycämantsi gloriaman pushamänantsipag. Tsaynog niycämaptintsega cuidädu mana cäsushwantsu. Mana cäsucog carga manami gloriaman chayashunpagtsu. ²⁻⁴ Nogantsi Jesucristupa wilacuyrinta musyashgantsinogmi unay Israel runacunapis musyargan Tayta Dios nishganta. Musyaycarpis mana cäsucushganpitami Tayta Dios caynog nergan: “Paycunaga promitishgä jamayta manami imaypis tarengatsu.”ⁿ Tayta Dios nishgannog tsay jamayta paycuna mana tariptinpis nogantsimi itsanga cäsucog carga tarishunpag. Tsay jamayga canga Tayta Dios lapanta camayta usharcur jamashgannogmi. Tayta Diosnintsi jamashganpitaga palabanchöpis caynogmi niycan: “Lapanta camarcurmi ganchis cag junagcho Tayta Dios jamargan.”^o

Tsaymi gloriaman chayaptintsi cay patsacho nacashgantsipita Tayta Diosnintsi jamayta gomäshunpag.

⁵ Tsaynog captinpis mana cäsucogcunaga manami tsay jamayta tarengatsu. Paycunapäga Tayta Diospa palabrancho caynogmi niycan: “Paycunaga promitishgä jamayta manami imaypis tarengatsu.”^p

⁶ Tsay nishgannoglami unay Israel runacunata mana cäsucog cashpan Tayta Dios promitishgan jamayta mana tarergantsu. Tsaynog captinpis Tayta Diosnintsi promitimashgantsi jamayta chasquishunpag pay nishgancunata cäsucurmi. ⁷ Tsay jamayta chasquinantsipagmi Tayta Diosnintsi rey Davidta tanyatsergan caynog nir escribinanpag:

“Shonguyquita chucruyätsinayquipa trucanga Tayta Dios nishushgayquita canan junagjucla chasquicäriy.”^q

⁸ Tayta Dios nishganta chasquicur nogantsipis promitishgan jamayta chasquinantsipag captenga ama yarpäshuntsu Canaán nacioncho unay Israel runacunata tsay jamayta tarishganta. Canaánman yaycur tsay jamayta tarishga captenga Tayta Diosnintsi manami promitimashwantsu cargan gloriacho jamayta tarinantsipag cashganta. ⁹ Tsay jamayga canga rasunpa cag jamaymi. ¹⁰ Cay patsata camayta usharcur Tayta Diosnintsi jamashgannogmi nogantsipis nacashgantsicunapita jamar gloriacho payta cushishga alabashunpag. ¹¹ Tsaynog caycaptenga shumag yarpachacushun gloriaman chayar tsay jamayta tarinantsipag. Cuidädu Israel runacunata mana cäsucog cashganpita Canaán nacionman mana yaycushgannog nogantsipis mana cäsucog cashgantsipita gloriaman mana yaycushwantsu.

¹² Tayta Diosnintsi palabranga munayniyogmi caycan. Tsaymi ishcan wagtanpa ali aflashga espädanog car shonguntsimanpis, yarpaynintsimanpis y togshuntsimanpis chayan imanog cashgantsitapis tan-

ⁿ 4.2-4 Salmo 95.11. ^o 4.2-4 Génesis 2.2. ^p 4.5 Salmo 95.11. ^q 4.7 Salmo 95.7-8.

tyatsimänantsipag.¹³ Lapan camashgancunata ricaptinmi Tayta Diosnintsipita pacacuyta mana camäpacun-tsitsu. Imata ruraptintsipis payga ricaycämantsimi. Tsaymi lutanta rurashgantsipitapis parlashgantsipitapis juzgamäshunpag.

Lapanpitapis más munayniyog mandag cüra Jesucristo cashgan

¹⁴ Tayta Diosnintsipa tsurin Jesucristo gloriacho mandag cürantsimi caycan. Tsaynog caycaptenga payman yäracur mana ajayaypa Tayta Dios munashgannog imaypis cawashun. ¹⁵ Cay patsacho caycaptinmi Jesucristuta jutsata ruratsiyta Satanás munargan. Tsaynog munaptinpi Jesucristoga manami jutsata rurashgatsü. Tsaymi nogantsitapis Satanás jutsata ruratsiyta munamaptintsega Jesucristo tanyaycan tentación imanog cashgantapis. Tsayta tanyarmi yanapamantsi tentacionta mana cäsüpänantsipag.

¹⁶ Imaypis yanapamänantsipag caycaptenga cuyapäcog Diosnintsita mana mantsacuyta manacushun. Payta manacorga trönuncho paywan parlaycagnogmi caycantsi. Tayta Diosnintsita manacuptintsega ima nacaycho captintsipis pay yanapamäshunmi.

5 ¹ Israel nacioncho más mandag cüraga Tayta Diosta manacärin runacuna jutsancunapita perdónashga cananpagmi. Tsaynogpis altarcho rupatsipäcun runacuna apamushgan uywacunata y cosëchapita shuntarcu apamushgantapis.² Más mandag cürapis runala carmi imalachöpis jutsayog caycan. Tsaymi

runacuna mana tanyacuyta jutsata rurapäcuptin cuyapan.³ Nircurmi uywata altarcho pishtarcur rupatsin quiquinpa jutsancunapita y runacunapa jutsancunapitapis.

⁴ Tsaynogpis mandag cüraga manami quiquinpa munaynilanpitatsu yaycun mandag cüra cananpag. Tsaypa trucanga Aaronnogpis mandag cüra cananpäga pipis yaycun Tayta Diosnintsi churaptinragmi. ⁵ Tsaynoglami Jesucristupis Tayta Diosnintsi churaptinrag mandag cüra caycan. Jesucristupag Tayta Diosnintsipa palabbranchöpis caynogmi escribirayan:

“Ganga cuyay tsurëmi canqui.

Tsaymi gamta churä lapanta mandanayquipag.”^s

⁶ Mastapis Tayta Diosnintsi caynogmi nergan:

“Ganga imayyagpis Melquisedecnogmi cüra canquipag.”^t

⁷ Cruzcho wanunanpag caycarmi Jesucristo wagashpan lapan shongunwan munayniyog Tayta Diosta manacorgan: “Yanapaycalämay munashgayquinog lapanpis camacaycunapag, Tayta” nishpan. Tayta Dios nishganta Jesucristo cumpleg captinmi manacushganta mayargan. ⁸ Tsaynogpami Tayta Diospa tsurin Jesucristo cruzcho wanunanpag caycarpis taytanta cäsucorgan. ⁹ Tsaynog cäsucog carmi payta chasquicogcunata Jesucristo salvayan Tayta Diospa naupancho imayyagpis cawapäcunapag. ¹⁰ Tsaynog captinmi Tayta Diosnintsi payta churargan Melquisedecnog lapanpitapis más mandag cüra cananpag.

^r 5.1 Jerusalemcho Israel runacunapa templun juchutsishgana captinmi cananga uywacunata altarcho rupatsinnatsu. ^s 5.5 Salmo 2.7. ^t 5.6 Salmo 110.4.

**Jesucristuta chasquicogcuna
güepaman mana cutiypa
cawananpag tanyatsishgan**

¹¹ Jesucristo mandag cürantsi cashganta tanyatsinäpäga atscaragmi caycan. Tsaynog captinpis manarag shumag tanyaptiquimi sasa caycan gamcunata masta yachatsinäpag.

¹² Cananyäga mayna yachatsicogna carcaycanquiman. Tsaynog canayquipag captinpis yapay galaycunanpitaragmi yachacuyta munarcaycanqui. Shacshana caycar micuytana micapäcunayquipa trucanga lëchilatarag upucuyta munarcaycanqui.

¹³ Tsaynog carga chuchuytag wamrancunanoglaragmi carcaycanqui. Tsaymi shumag mana tanyacärinquiragtsu Tayta Diosnintsi munashganog cawapäcunayquipag. ¹⁴ Chuchuytag wamranog canayquipa trucanga micuyta micognogna capäcunquiman. Micuyta micognogna carga imapis ali cashganta y mana ali cashganta maynami tanyapäcunquiman.

6 ^{1,2} Jesucristuta chasquicushgana caycarga shumag yachacäriy Jesucristupa wilacuynta galaycunanpita hasta ushananyag. Yachacushgana captiquega manami yaparir yaparir gamcunata yachatsëmannatsü Jesucristuta chasquicur jutsa ruraycunata cacharinayquipag. Tsaynogpis manami yaparir yaparir yachatsëmannatsü Tayta Diosman yäracur salvacärinayquipag, bautizacärinayquipag, mayor wauguicuna umayquiman maquina churaycur Tayta Diosta manacärinanpag, wanushcuna cawarimunanpag y cay patsa ushacaptin Tayta Diosnintsi lapan runacunata juzgananpagpis. ³ Tayta Diosnintsi yanapamaptintsega tsaycunapita más yachatsicuycunatapis yachacushunmi.

⁴ Jesucristuta chasquicushgana caycarga Tayta Diospa naupancho cawaycagnogmi cushishga cawaycantsi. Tsaynogpis Santu Espirituta chasquicushgana caycarga Tayta Diospa wamrancunanami caycantsi.

⁵ Jesucristupa wilacuyntin shonguntsiman chayaptinmi yachacuycantsi Tayta Dios munashganog cawananpsipag. ⁶ Tsaynog caycarpis güepaman cuterga Jesucristuta yapay crucificagnogmi caycantsi. Güepaman cutir perdonta manacuyta mana munaptintsega Tayta Diosnintsi manami perdonamëshunpagtsu.

⁷ Jesucristuman imaypis yäracogcunaga shumag ali chacranogmi caycan. ⁸ Jesucristuman manana yäracogcunami itsanga gara chacranog carcaycan. Tsaynog cagcunataga chacracho casha caycagcunata rupatsishganogmi Tayta Diosnintsi infiernuman gayconga tsaycho imayyagpis rupapäcunapag.

⁹ Cuyay waugui-panicuna, tsaynog nirpis manami yarpapäcötsu gamcuna chucru shonguyar Jesucristuman manana yäracunayquipag cashgantaga. Tsaypa trucanga yarpapäcö Tayta Dios munashganog imaypis cawar gloriaman chayapäcunayquipag cashgantami. ¹⁰ Imanog nacarpis payman yäracärishgayquitaga Tayta Diosnintsi manami gongangatsü. Tsaynogpis manami gongangatsü waugui-panicunawan cuyanacur yanapanacushgayquita. Tsaynog cawashgayquipitami gloriaman chayaptiqui premiuta goshunquipag.

¹¹ Jesucristuta chasquicushgayquipita-patsa ali cawapäcushgayquinogla Tayta Diosnintsi munashganog imaypis cawapäcuy. Wanunayquiyag tsaynog cawarga Tayta Diosnintsi naupanmanmi chayapäcun-

quipag.¹² Chucru shongu ama capä-cuytsu. Tsaypa trucanga Tayta Diosman unay yäracogcuna cawashgan-nogla gamcunapis payman yäracur imaypis cawapäcuy. Tayta Diosman yäracur cawagcunaga lapantsipis pay promitishgancunata chasquishunpagmi.

**Salvamänantsipag Tayta Diosnintsi
promitimashgantsita imaypis
cumplinanpag cashgan**

¹³ Abrahamta promitirmi Tayta Diosnintsi caynog nergan: ¹⁴“Gamta rasunpami bendicionnëta goshayquipag. Tsaynogpis gampita miragcunata yanapashag atscaman mirananpag.”^u

¹⁵ Tsaynog niptinmi Abrahamga tsurin yurinanpag cashganta criyir cushishga shuyaragan. Tsaypitani Tayta Dios promitishgannogla tsurin yurergan.

¹⁶ Runacuna maquina goshpan imatapis promitiptinmi musyantsi tsay promitishganta rasunpa cumplinanpag cashganta. ^{17,18} Tsaynoglami Tayta Diosnintsis Abrahamta nergan promitishganta cumplinanpag. Tsaymi musyantsi Abrahamta promitishganta cumplir salvamänantsipag cashganta. Tsayta musyaycarga imanog nacarpis payman mana ajayaypa yäracushun. ^{19,20} Tsaynogpis Tayta Dios salvamänantsipag promitimashgantsita lapan shonguntsiwan criyishun. Mandag cüra templucho cag cortinata pasar Lugar Santísimuman yaycushgannogmi Jesucristupis gloriacho caycag templuman yaycushga Tayta Diospa naupanman pushamänantsipag. Imayyagpis más mandag

cürantsi carmi Jesucristo tsayman pushamantsi. Payga Melquisedecnog mandag cürami caycan.

**Melquisedec pï cashgantapis
tantyatsishgan**

7¹⁻³ Lapantapis camag Tayta Dios acrashgan cürami Melquisedecga cargan. Tsaynogpis payga Salem marcacho reymi cargan. Melquisedec ninanga caycan “Ali mandag” ninanmi. Salem marcaga “Ali täcuy marca” ninanmi. Tsaymi Melquisedecga ali täcuy marcapa mandagnin cargan. Melquisedecpitaga manami pipis musyantsu maygan casta cashganta ni maman ni taytan pï cashgantapis. Tsaynogpis manami pipis musyantsu imay yurishganta ni wanushgantapis. Tsaymi Diospa tsurin Jesucristunog imayyagpis cüra cashganta yarpaycantsi.

Guërracho mandagcunata vincishganpita Abraham cutiyämuptinmi Melquisedec taripar payta chasquicorgan. Nircurnami Tayta Diosta manacorgan Abrahamta yanapananpag. Abrahamnami guërracho vincir lapan shuntamushgancunapita diezmuta Melquisedecta entregaycorgan.^v ⁴ Tsaynog entregaptinmi tantyacuntsi Abrahampita más munayniyog Melquisedec cashganta.

⁵ Moisés escribishgan leycunachoniyca Leví casta cüracuna Israel mayincunapita diezmuta chasquinanpag cashgantami. ^{6,7} Leví casta mana caycarpis mandag rey Melquisedec cüra cashpan munayniyogmi cargan Abraham entregashgan diezmuta chasquinanpag. Diezmuta chasquircurmi Melquisedecga

^u **6.14** Génesis 22.17. ^v **7.1-3** Diezmoga caycan cada chuncapita jucmi. Melquisedecpita masta musyanayquipag liyinqi Génesis 14.17-20-ta.

Abrahamta bendicionta gorgan. Tsaynog captinmi tantyantsi Melquisedecga Abrahampita más munayniyog cashganta. Tsaynog más munayniyog caycan Tayta Diosnintsi promitishganta Abraham chasquishga captinpis.

⁸Tayta Diospa palabrançhoga manami imaypis nintsu Melquisedec wanushganta. Leví casta cüracuna wanushgantami itsanga niycan. Tsaynog captinmi tantyantsi Melquisedec Leví casta cüracunapita más munayniyog cashganta.

^{9,10}Abrahampa wilcancuna mirashgancunapitami Leví casta cüracuna caycan. Tsaynog captinmi Melquisedecta Abraham diezmuta entregaptin Leví casta cüracuna manarag yurirpis diezmuta entregagnog cashga. Tsaynogpapis tantyantsi Leví casta cüracunapita y Abrahampitapis Melquisedec más munayniyog cashganta.

¹¹Tsaynogpis Leví casta cüracuna altarcho rupatsishgalanwan runacuna perdonashga captenga ¿imapanatag Jesucristo shamorgan? Payga Melquisedecnogpis manami Leví casta cüratsu caycan. ¹²⁻¹⁴Musyashgantsinogpis Jesucristoga Judá castapitami yurishga. Tsay castapita cüra cananpag cagtaga Moisés manami imatapis rimacushgatsu. Tsaynog captinpis cürantsi cananpag Jesucristutami Tayta Diosnintsi churashga.

Judá castapitana cüra cananpag truncatsirmi Moisés escribishgan leycunatapis trucatsishga. ¹⁵Moisés escribishgan leycunata trucatsishganta musyantsi Melquisedec cüra cashgannog Jesucristupis cüra canan-

pag Tayta Dios churashga captinmi.

¹⁶Leví castapita mandag cüra cananpag Tayta Dios nishga captinpis Jesucristoga manami Leví castatsu cargan. Paytaga mandag cüra cananpag Tayta Diosnintsi churashga imayyagpis cawag cashganpitami.

¹⁷Jesucristo cüra cananpagmi cay patsacho manarag yuriptinpis Tayta Diospa palabrancho caynog escribipaycan: “Gamga imayyagpis Melquisedecnogmi cüra canquipag.”^w

^{18,19}Tsay nishgannoglamí Jesucristuta cüra cananpag Tayta Diosnintsi churar Moisés escribishgan leycunatapis trucatsishga. Leycuna nishgannog Leví casta cüracuna cumpliptinpis runacuna manami Tayta Dios munashgannog cawayta camäpacushgatsu. Tsaymi Jesucristutana Tayta Diosnintsi churashga cürantsi cananpag. Paymi itsanga lapan jutsantsicunata perdonamashpanti Tayta Dios munashgannog cawanantsipag yanapaycämanti. Pay cürantsi captinmi Tayta Diosta manacushpanti paypa naupancho caycagnogna caycanti.

²⁰Jesucristo cüra cananpag Tayta Diosnintsi churarmi promitergan imayyagpis cüra cananpag. Manami maygan cüratapis cüra cananpag churar tsaynog promitergantsu. ²¹Jesucristutami itsanga tsaynog promitir caynog nergan:

“Tayta Diosnintsimi gamta promitishorgayqui caynog nir:

‘Gamga imayyagpis Melquisedecnogmi cüra canquipag.’

Tsay promitishushgayquitaga Tayta Dios cumplengami.”^x

²²Jesucristo cürantsi cananpag churashga captinmi payga garantiantsi

^w7.17 Salmo 110.4. ^x7.21 Salmo 110.4.

caycan Tayta Diosnintsi perdonamänantsipag. Tayta Diosnintsi tsaynog perdonamänantsipagmi mushog conträtuta rurashga. Mushog conträtoga más alimi caycan Israel runacunan punta cag rurashgan conträtupitapis.

²³ Punta cag conträtuchöga mandag cüra wanuptin juc cüratanami churapäcog truncan cananpag. ²⁴ Jesucristumi itsanga mana wanog car imayyagpis mandag cürantsi caycan. Paytaga manami imayypis trucatsengatsu. ²⁵ Mandag cüra carmi payta chasquicogcunapäga Tayta Diosnintsi imayypis Jesucristo manacuycan. Paycunatami salvan Tayta Diospa naupancho imayyagpis cawanapanpag.

^{26,27} Jesucristoga manami cay patsacho mandag cüranogtsu caycan. Payga jutsata rurag runacunan wan purirpis manami imayypis jutsata rurashgatsu. Tsaynogpis cananga lapanpag munayniyog carmi Tayta Diospa derëcha cag naupancho caycan.

Cay patsacho mandag cüraga waran waran uywacunata pishtarcur altarcho rupatsipäcun quiquincunapa y waquin runacunapa jutsancuna perdonashga cananpagmi. Jesucristumi itsanga juc cutila cruzcho wanushga nogantsi-raycu. Tsaynogpami imayyagpis payman yäracogcunapa jutsancunata Tayta Diosnintsi perdonan salvashga cananpag.

²⁸ Leví casta mandag cüracunaga jutsayog runalami carcaycan. Tayta Diospa tsurin Jesucristumi itsanga jutsaynag caycan. Tsaymi paytaga Tayta Dios churashga imayyagpis mandag cürantsi cananpag.

Runacunata salvananpag Tayta Diosnintsi mushog conträtuta rurashgan

8^{1,2} Mandag cürantsi Jesucristoga gloriacho cag templuchömi Tayta Diospa derëcha cag naupancho jamarayan nogantsipag imayypis manacushpan. Tsay templitaga manami runacunatsu sharcatsishga, sinöga quiquin Tayta Diosnintsimi.

³ Cay patsacho más mandag cüraga runacuna jutsata rurashganpita uywacunatami pishtarcur altarcho rupatsin. Jesucristumi itsanga jutsantsicunata perdonamänantsipag nogantsi-raycu cruzcho wanushga.

⁴ Cay patsalacho carga Jesucristo manami cüra canmantsu cargan. Cay patsachöga Moisés escribishgan leycunacho nishgannog cüracuna caycanmi runacuna apamushganta altarcho rupatsinanpag. ⁵ Cay patsacho cag cüracunaga gloriacho caycag templu-niragta rurashgalanchömi Tayta Diosta sirvipäcun. Tsayta musyantsi Moiesta Tayta Diosnintsi caynog nishga captinmi: “Gloriacho cag templo imanog cashgantapis jircachoricatsishgätanogla tabernäculuta^y ruratsinqui.” ⁶ Cay patsacho cag cüracuna runa rurashgan templucho sirvipäcuptinpis más mandag cürantsi Jesucristumi itsanga ciëlucho cag templucho caycan. Tsaychömi Tayta Diosta manacuycan mushog conträtoga nishgannog jutsantsicunata perdonamänantsipag. Tsay mushog conträtoga naupa cag conträtupitapis más alimi caycan.

⁷ Naupa cag conträtulawan runacunapa jutsancunata perdonarga

^y 8.5 Tabernáculo cashgantanolami Jerusalemcho templitapis sharcatsorgan. Tabernáculo imanog cashganta musyanayquipag liyinqui Hebreos 9.1–7; Éxodo 25.40; 26.30.

manami yapay juc conträtuta Tayta Dios runanmantsu cargan. ⁸Punta cag conträtuta runacuna cumpliyta mana camäpauptinmi Tayta Diosnintsi caynog nergan:

“Israel runacunawan y Judá runacunawan mushog conträtuta runanäpag cag junag chämonganami.

⁹ Tsay conträtoga manami Israel runacunata Egiptupita jorgamur rurashgä conträtunogtsu canga.

Naupa cag conträtuta mana cumplipäcushganpitami paycunata mana cäsupashcänatsu.

¹⁰ Tsaynog captinpis Israel runacunawan yapaymi conträtuta rurashag.

Tsaynog rurarmi leynëcunata shongunman escribishag imaypis yarparänanpag. Paycunapa Diosninmi cashag. Paycunami maquëcho cangapag.

¹¹ Tsay witsanga mushog conträtuta chasquicogcuna wamracunapita galaycur auquin runacunayagmi lapanpis musyapäconga Tayta Diosnin cashgäta.

Tsaymi pipis mana yachaycätsenganatsu Tayta Diosnin cashgäta musyapäcunanpag.

¹² Tsaynogpis lapan jutsancunata perdonar mananami jutsa rurashgancunata imaypis yarpäshagnatsu.”^z

¹³ Tsay nishgannoga mushog conträtuta Tayta Diosnintsi rurashgana captinmi naupa cag conträtuta mana cumplintsinatsu.

Unay cag conträtö imanog cashgantapis tanyatsishgan

9 ¹Unay cag conträtuchöga Tayta Diosnintsi adorapäcog tabernäculuchömi. Tsaynogpis mandamientucuna carganmi yachacärinanpag.

² Tsaymi Tayta Dios nishgannog tabernäculuta rurapäcorgan ishçay cuartuyogta. Punta cag cuartuchömi caycargan örupita rurashga ganchis ricrayog mechëro, Tayta Diospag churashgan tanta y tanta churacuna mësapis. ^a Tsay cuartupa jutinmi caycan “Lugar Santu”. ³ Más ruri cag cuartupa jutinmi caycan “Lugar Santísimo”. Tsay ishçay cuartucunaga racta cortinawanmi raquirargan.

⁴ Lugar Santísimuchömi cargan örupita rurashga altar. Tsay altar jananchömi inciensuta rupatsipäcog. Tsaynogpis tsay cuartuchömi cargan Tayta Diospa babulnmi. Tsay babulnami janampa rurinpa öruta lagapargan. Tsay babulchömi winarargan örupita rurashga tazun. Tsay tazunchömi Israel runacunata Tayta Dios camaripashgan maná nishgan micuy churarargan. Tsaynogpis tsay babulchömi winarargan Aaronpa tsintsimushgan tucrun y ishçay läja rumicunacho escribiraycag chunca mandamientupis. ⁵ Tsay babul jananchönamo caycargan örupita rurashga ishçay querubin angilcuna. Tsay querubincunami babul jananchö älan mashtashga caycargan. Maspis caycanragmi tsaycunapita tanyatsinäpäga.

⁶ Tsay tabernäculucho punta cag cuartumanga waran waran cüracuna yaycog leycuna nishgannog lapanta

^z 8.12 Jeremías 31.31–34. ^a 9.2 Tsay mechërupita y mësapita masta musyanayquipag liyinqi Éxodo 25.23–40; Levítico 24.1–9.

rurapácunanpagmi.^{b 7} Lugar Santísimumanga más mandag cüralami watacho juc cuti yaycog. Tsaymanga yaycog uywapa yawarninta apacurcurmi. Tsay yawarta apargan quiquinpa jutsanpita y runacuna mana tanyacuypa jutsata rurashganpita perdonta manacunanpagmi.⁸ Lugar Santísimuman más mandag cürala yaycuptinmi Santu Espíritu tanyatsimantsi unay cag conträtuta síguerga nogantsipis Tayta Diospa naupanman mana chayanantsipag cashganta.

⁹Naupa cag conträto nishgannog cüracuna uywacunata altarcho rupatsiptinpis tsaylawanga runacuna

manami perdonashgatsu cargan.

¹⁰Tsaynogpis naupa cag conträtuchöga escribiraycan imata micunantsipag y imata mana micunantsipagpis, imata upunantsipag y imata mana upunantsipagpis, tsaynogla yacuwan purificacunanpsipagpis.^c Tsaycunataga runacuna cumplinapag cargan hasta Tayta Dios mushog conträtuta rurashganyaglami.

Yawarninta Jesucristo jichashganpita perdonashga cashgantsi

¹¹Mushog conträtuchöga Jesucristunami mandag cürantsi caycan. Paymi gloriacho caycag templuman



^b 9.6 Tsay rurapácushgancunata musyanayquipag liyinqui Éxodo 27.20–21; 30.7–8; Levítico 24.8–9. ^c 9.10 Naupa cag conträtucho micucunapita y purificacuyupita leycuna imata nishgantapis musyanayquipag liyinqui Levítico 11.2,25; 15.8; Números 6.3; 19.13.

yaycushga. Tsay temploga manami cay patsacho runa rurashgan tem-
plutsu caycan, sinöga gloriacho qui-
quin Tayta Dios rurashgan templumi.
¹² Gloriacho caycag templuman yay-
cunanpäga manami cay patsacho
cüracuna rurashgannog chivupa
becërrupa yawarninta aparcurtsu
yaycushga, sinöga quiquinpa yawar-
ninta jicharmi yaycushga. Cay patsa-
cho cag templuman mandag cüranog
cada wata yaycunanpa trucanga juc
cutilami gloriacho caycag templu-
man yaycushga chasquicogcunata
salvananpag.

¹³ Naupa cag conträtuchöga niycan
törucunapa chivucunapa yawarninta
y ternërata rupatsishganpa uchpanta-
pis runacunapa jananman mashta-
nanpagmi. Tsay nishgannogla mash-
taptinmi runacuna Tayta Diosta ado-
rananpag purificashga cargan. ¹⁴ Je-
sucristo yawarninta cruzcho jichay-
cuptenga manami janalanpatsu puri-
ficashga caycantsi, sinöga jutsata
rurashgantsipita perdonashga car
shonguntsipis maylashganami cay-
can. Tsaynog perdonashga canantsi-
pagmi Santu Espiritu Jesucristuta
yanapargan Tayta Dios munashgan-
nog nogantsi-raycu cruzcho wanu-
nanpag. Tsaynog perdonamashcantsi
cushishgala Tayta Dios munashgan-
nog cawar alabanantsipagmi.

**Mushog cag conträto välinanpag
Jesucristo yawarninta jichashgan**

¹⁵ Tsaynog nogantsi-raycu cruzcho
wanuptinmi Tayta Diosnintsi mushog
conträtuta rurargan. Tsaynogpami
Tayta Diosnintsi acrashgan cagcuna
perdonashga car promitishgan heren-
ciata gloriacho chasquengapag. Mana-

mi nogalantsita perdonamänantsipag-
tsu Jesucristo wanorgan, sinöga punta
cag conträtuta chasqueg runacunata-
pis perdonananpagmi wanorgan.

^{16,17} Tayta Dios runacunawan
rurashgan conträtoga testamentu-
nogmi caycan. Testamentu ruratseg
runa cawashganyäga testamentu rura-
tsishganpis manami välinragtsu. Tes-
tamentu ruratseg wanurpuptinnami
itsanga tsay testamentu välin. Tsay-
noglami Tayta Diosnintsi rurashgan
mushog conträtupis välinanpäga Jesu-
cristurag yawarninta jichar cruzcho
wanorgan.

¹⁸ Punta cag conträtupis välinan-
päga uywacunatarag Moisés pishta-
tsergan yawarninta jichananpag.

¹⁹ Manarag pishtarmi runacunata
liyipargan conträtucho escribiray-
cashgan mandamientucunata y ley-
cunatapis. Liyiparcurmi becërrucu-
nata y chivucunata pishtatsir yawar-
ninta chasquergan. Nircurmi tsay
chasquishgan yawarman yacuta
yaparcur hisöpo nishgan yörapa
rämancunata puca hiluwan juc gue-
ruman watapargan. Tsaywanmi tsag-
tsupargan escribiraycashgan leycu-
nata y lapan runacunatapis. ²⁰ Nir-
curmi paycunata Moisés caynog ner-
gan: “Cay yawarwan gamcunata
tsagtsupaycä gamcunawan Tayta
Diosnintsi conträtuta rurashgan väli-
nanpagmi.”^d ²¹ Tsaynoglami tabernä-
culutapis y tabernäculucho manëjo
utensiliucunatapis lapanta tsay
yawarlawan Moisés tsagtsupargan.

²² Moisés escribishgan leycuna-
chöga niycan imapis purificashga
cananpäga yawarwan tsagtsupashga
cananpagmi. Yawarwan mana tsag-
tsupaptenga manami pipis jutsancu-

^d 9.20 Éxodo 24.8.

napita perdonashgatsu canman.

²³ Tsaynog captinmi cay patsacho cag templuman mandag cūra yaycur uywacunapa yawarninwan tsagtsupan. Gloriacho cag templuman Jesucristo yaycunanpāga manami uywacunapa yawarnintatsu jichargan, sinōga quiquinpa yawarnintami.

**Jesucristo cruzcho wanushganpita
Tayta Dios perdonamashgantsi**

²⁴ Jesucristo Tayta Diosta nogantsipag manacunapāga manami runacuna rurashgan templumantsu yaycorgan, sinōga gloriacho caycag templumanmi. ²⁵ Tsayman yaycunanpāga juc cutilami quiquinpa yawarninta jichar wanushga. Tsaynog carga manami cay patsacho mandag cūranogtsu Jesucristo caycan. Cay patsacho mandag cūraga cada watami Lugar Santísimuman yaycun uywacunapa yawarninta tsaycho tsagtsunanpag. ²⁶ Gloriacho cag templuman Jesucristo cada wata cuterga cada watami wanunman. Tsaynog carga cay patsata camashganpita patsa ayca cutishi wanunman cargan. Atsca cuti tsaynog wanunpanpa trucanga Jesucristo juc cutilami cruzcho wanushga jutsantsicunata perdonamānantsipag. ²⁷ Tsaynoglamilapan runacunapis juc cutila wanupācun. Wanushganpita cawarircatsimurmi Tayta Dios lapan runatapis juzganga pag. ²⁸ Runacuna juc cutila wanushgannogmi Jesucristupis juc cutila wanushga jutsantsicunata Tayta Dios perdonamānantsipag. Jesucristo cay patsaman cutimur manami yapay runacunapa jutsancunapita wanunpagtsu cutimonga, sinōga pay munashgannog cawagcunata gloriaman pushananpagmi.

10 ¹ Moisés escribishgan leycunaga manami salvamānantsipagtsu cargan, sinōga salvacionpita tanyatsimānalantsipagmi. Tsaymi tsay leycuna nishgannog wata wata uywacunata altarcho rupatsiptinpis tsaycunalawanga runacunata Tayta Dios mana perdonargantsu. ² Uywacunata altarcho rupatsishgalanwan perdonashga carga runacuna manami jutsayog cashganta yarparaycanman. Tsaynogpis manami wata wata uywata apanmantsu jutsancunapita rupatsinanpag. ³ Cada wata uywacunata rupatsirmi jutsa rurashgancunata yarparcaycan. ⁴ Chivucunata törucunata pishtar yawarninta jicharpis runacuna manami tsaylawanga perdonashgatsu caycan.

⁵ Tsaymi cay patsaman Jesucristo shamur Tayta Diosta caynog nergan: “Uywacunata y tsaqui micuycunata rupatsishganta ajayashcanquinami.

Tsaymi cay patsaman cachamashcanqui munashgayquita ruranāpag.

⁶ Uywacunata y tsaqui micuycunata runacuna apamushganpis manami gam munashgayquinogtsu cashga.

⁷ Tsaymi noga nergä: ‘Escribiraycashgancho nishgannog munashgayquita ruranāpag listumi caycä, Tayta Dios.’”^e

⁸ “Runacunapa jutsancunata perdonashga cananpag uywacunata y tsaqui micuycunata rupatsishganta ajayashcanquimi” nerga punta cag contrātucho nishgancunatami Jesucristo yarpätsimantsi. ⁹ “Escribiraycashgancho nishgannog munashgayquita ruranāpag listumi caycä, Tayta Dios”

^e 10.7 Salmo 40.6–8.

nerga mushog conträtuta Tayta Dios rurashgantami Jesucristo nergan.

¹⁰ Tayta Dios munashganta rurar Jesucristo nogantsi-raycu juc cutila wanorgan jutsantsicunapita Tayta Diosninti perdonamänantsipag. Perdonamashpantsimi shuntacamashcantsi paypa maquinchöna cawanantsipag.

¹¹ Israel cüracunaga waran waranmi uywacunata altarcho rupa-tsipäcun Tayta Diosman yäragocuna jutsancunapita perdonashga cananpag. (Tsaynog rupatsiptinpis manami tsaycunalawanga runacunata Tayta Dios perdonargantsu.)

¹² Cürantsi Jesucristumi itsanga juc cutila cruzcho wanushga jutsantsicunapita perdonamänantsipag. Wanushganpita cawarircamur cananga lapanpag munayniyog cashpanmi Tayta Diospa derëcha cag naupancho jamarayan. ¹³ Tsaychömi jamaranga lapan contranta Tayta Diosninti vincinanyag.

¹⁴ Jesucristo cruzcho wanushga captinmi payta chasquicogcunata Tayta Diosninti lapan jutsancunata perdonaycan. Tsaynogpis waran waran paycunata yanapaycan jutsata mana ruraypa cawanapag. ¹⁵ Tsaynog cananpagmi Santu Espiritupis caynog nergan:

¹⁶ “Paycunawanmi conträtuta rurashag.

Tsaynog rurarmi leynëcunata shongunman escribishag imaypis yarparänapag.

¹⁷ Tsaynogpis lapan jutsancunata perdonar mananami jutsa rurashgancunata imaypis yarpäshagnatsu.”^f

¹⁸ Jesucristuta chasquicur tsaynog perdonamaptintsimi cananga uywacunata ni tsaqui micuytapis manana rupatsintsinatsu jutsata rurashgantsipita perdonashga canantsipag.

Tayta Dios munashgannog cawanantsipag tanyatsicuy

^{19,20} Waugui-panicuna, Jesucristo nogantsi-raycu yawarninta jichashganpita Lugar Santísimuman ^g yaycognogmi Tayta Diosnintsipa naupancho cananpis caycantsi. ²¹ Tsaynogpis Jesucristo gloriacho más mandag cürantsimi caycan. ²² Tsaynog caycaptenga mana mantsacuypa Tayta Diosnintsita imay hörapis manacushun. Tsaynogla lapan voluntänintsiwan pay munashganta rurashun. Imanog nacarpis payman lapan shonguntsiwan imaypis yäracushun. Jutsantsita perdonamashgantsipita payta agradëcicushun. Tsaynogpis lapan jutsa rurashgantsicunata cacarishun. Tsaynogpami limpio armacushganog Tayta Diosnintsipa naupanman chayashunpag.

²³ Musyantsimi Tayta Diosninti naupanman pushamänantsipag promitimashgantsita. Payga lapan promitimashgantsicunata imaypis cumplinmi. Tsaynog caycaptenga guepaman mana cuticuypa Jesucristuman imaypis yäracushun. ^{24,25} Tsaynogpis Tayta Diosta alabanapag juntacayta waquin waugui-panicuna guellanashgannöga ama guellanäshuntsu. Tsaypa trucanga Jesucristo cutimunanpagna caycashganta musyar imaypis juntacäshun. Tsaynog juntacarmi shacyätsinacushun jucninti jucnintsipis yanapanacur y cuyanacur cawanantsipag.

^f **10.17** Jeremías 31.33–34. ^g **10.19,20** Lugar Santísimo imanog cashganta musyanayquipag liyinqui Hebreos 9.3.

²⁶ Jesucristupa wilacuyninta musyaycar yachaycar pipis yapay jutsata rurarga Jesucristo nogantsi-raycu wanushgantami manacagman churaycan. Manacagman churagcunata Tayta Diosnintsi mananami perdonangatsu. ²⁷ Tsaypa trucanga juicio final junag paycunata shuyaraycan rupaycag infiernulanami.

²⁸ Moisés escribishgan leycunata mana cäsucuyya jutsa ruragcunata ishca y o quimsa testigo careaptenga mana cuyapaypami wanutsipäcog.

²⁹ Moisés escribishgan leycunata mana cäsucogta tsaynog wanutsinapag caycaptenga ¿manatsurag más peor infiernucho nacanga Jesucristuta chasquicurcur guepaman cuticogcunaga? Paycunaga Jesucristo yawarninta jichar cruzcho wanushganta manacagmanmi churaycan y cuyapäcog Santu Espiritutapis fiyupami rabiaycätsin. ³⁰ Jutsata ruragcunapäga Tayta Diosnintsi caynog nergan:

“Mana chasquicamagcunataga nogami mana cuyapaypa castigashagpag.”

Tsaynogmi mastapis nergan:

“Chasquicamashga caycar jutsa ruragcunataga nogami juzgashagpag.”^h

³¹ Tsaynog niycaptenga ipasaypa mantsariypagmi nacapäcongapag Tayta Diosta mana cäsucur rabiatssegcunaga!

³² Waugui-panicuna, tsaynog caycaptenga yarpapäcuy Jesucristuta chasquicushgayqui witsan imanog nacapäcushgayquitapis. Tsayjina nacarpis gamcuna manami guepaman cutipäcushcanquitsu. ³³ Tsaynogpis ama gongapäcuytsu Jesucris-

tuta chasquicushgayquipita magashga y ashlishga cashgayquita. Tsaynogla waquintapis magashga captin y ashlishga captin shacyätsishcanquimi mana laquicunanpag. ³⁴ Jesucristuta chasquicushganpita carcilcho cagcunatapis yanapashcanquimi. Imayquitapis apacuptin cachaparishcanquimi. Apacuptinpis mana laquicushcanquitsu gloriacho mana ushacag herenciata chasquinayquipag cashganta musyashpayquimi.

^{35,36} Waugui-panicuna, cananpis tsaynogla Tayta Diosman mana ajayaypa yäracäriy. Imanog nacarpis guepaman mana cuticuyya Tayta Dios munashgannog cawapäcuy. Tsaynog cawarmi Tayta Diosnintsi prometimashgantsinogla gloriacho imayyagpis cushishga cawashunpag. ³⁷ Tayta Diosnintsi palabanchöpis caynogmi niycan:

“Shamunäpag cag höra chämonganami.

³⁸ Tsaynog caycaptenga chasquicamagcuna imaypis yäracamashpan cawapäcutsun. Guepaman cutir perdonta mana manacamagcunataga manami ricaytapis munätsu.”ⁱ

³⁹ Tsaynog captenga tantyacushun guepaman mana cuticuyya cawanantsipag. Tsaynogpami infiernuman gaycushga canantsipa trucanga gloriaman chayashunpag.

Unay runacuna

Tayta Diosnintsiman yäracushgan

11 ¹ Tayta Diosman yäracurmi musyantsi pay prometimashgantsicunata lapanta cumplinapag cashganta. Tsaymi prometimashgantsicunata manarag ricarpis

^h 10.30 Deuteronomio 32.35–36. ⁱ 10.38 Habacuc 2.3–4.

shuyaraycantsi chasquinantsipag cagta. ²Tayta Diosnintsi munashgannog cawag unay runacunatapis payman yäracushganpitami salvargan.

³Tayta Diosnintsiman yäracorga criyintsi cay patsa, jana patsa, inti, quilla y lapan estrellacunapis cananpag niptilan yurishganta. Lapan ricaycashgantsitapis pay camashga imapis mana cashganpitami.

⁴Tayta Diosman yäracurmi pay munashgannog alinnin uyshata Abel apargan altarcho rupatsinanpag. Wauguin Cainga manami Tayta Dios munashgannogtsu apargan. Abel apashganta Tayta Diosnintsi chasquishga captinmi musyantsi Diosman yäracur pay munashgannog cawashganta. ^jTsaymi Abel wanushgana captinpis tantyacuntsi nogantsipis Abelnog Tayta Diosman yäracunantsipag cashganta.

⁵Enoçtapis Tayta Diosman yäracushganpitami manarag wanuptin gloriaman pushacushga. ^kTayta Diosnintsi palabanchöpis niycan Enoçga Tayta Diosnintsi munashgannog cawashgantami.

⁶Tayta Diosnintsiman mana yäracorga manami imaypis pay munashgannog cawashuntsu. Tayta Diosnintsiman yäracunantsipäga criyishun pay cashganta. Tsaynogpis criyishun payman yäracuptintsi yanapamänantsipag cashganta.

⁷Yäracurmi Noëpis Tayta Dios nishgancunata cäsucur jatuncaray büquitanog arcata rurargan tsurincuna y lumtsuynincunapis diluvio captin mana wanunanpag. Tsaynogpis Tayta Dios nishganta criyirmi runacunata wilapargan jutsa rurash-

gancunata mana cacharerga shengaypa wanunanpag cashganta. Tayta Dios nishganta criyir payman yäracuptinmi Noëta Tayta Diosnintsi jutsaynagtana chasquergan. Tsaymi runacunata ushacätsirpis Noëtaga salvargan. ^l

⁸Tayta Diosman yäracurmi Abraham pispis marcanta cachariycur Tayta Diosnintsi entregananpag cag nacionman aywacorgan. Tayta Dios nishgannog aywacorgan may nacionman chayanapag cashgantapis mana musyarcarmi. ^m ^{9,10}Tsaychömi Abrahamga tol dërawan wayita ruraycur jäpa runanogla targan. Tsaynog targan gloriacho Tayta Diosnintsi rurashgan marcaman chayanapag cashganta musyarmi. Tsaynoglami tsurin Isaacpis y Isaacpa tsurin Jacobpis Diosnintsi entregashgan nacioncho taycarpis tol dërapita rurashga wayicunalacho targan. ⁿ

¹¹Tsaynoglami Tayta Diosman Abraham yäracuptin tsurin yurergan auquinna caycaptinpis y warmin Sara chacwanyashganyag golog caycaptinpis. ^o ¹²Tsay tsurinpita miragcunami yupaytapis mana atipaypag estrellanograg y lamar cuchuncho agunograg carcaycan.

¹³Tsaynog mirananpag Tayta Dios promitiptinpis Abraham, Sara, Isaac y Jacob cawaycashganyag tsurincuna manami tsaytsica cashgaragtsu. Tsaynog captinpis paycunaga wanushganyagmi Tayta Diosnintsi promitishganman yäracorgan. Paycunaga cay patsacho ushacagla carmi tantyacorgan gorpanogla cashganta. ¹⁴Cay patsacho gorpanogla carcaycashganta tantyarmi gloriacho caycag marcaman

^j11.4 Génesis 4.1–5. ^k11.5 Génesis 5.18–24. ^l11.7 Génesis 6.9–22. ^m11.8 Génesis 12.1–5. ⁿ11.9,10 Génesis 12.6–9. ^o11.11 Génesis 17.15–21; 21.1–7.

aywacunanpag shuyarpaycargan.

¹⁵ Paycunaga manami yarpargantsu unay tashgan marcanman cutiyta. Marcanpag laquicorga imaycanogpapis cuticärinmanmi cargan. ¹⁶ Marcanpag laquicunanpa trucanga gloriacho caycag marcapagmi yarpargan. Tsaynog yarpapartinmi Tayta Dios cushicur tsay marcata camarishgana paycunata shuyaraycätsin.

¹⁷ Tsurin Isaacta wanutsinanpag Tayta Dios niptinpis payman yäracurmi Abrahamga altarcho rupatsinapag listu caycargan. ¹⁸ Tsaynog wanutsinanpag listu caycargan paypita atscaman mirananpag Tayta Dios promitishga caycaptinpis. ¹⁹ Abrahamga Tayta Diosman yäracurmi yarpargan wanutsiptinpis Isaacta cawaritsimunanpag cashganta. Tsaynog yäracuptinmi Abrahamta Tayta Dios nergan Isaacta mana wanutsinanpag.

²⁰ Isaacpis Tayta Diosman yäracurmi Jacobta y Esäuta Tayta Dios yanapananpag cashganta musyar bendicionninta gorgan. ^r

²¹ Jacobpis wanunanpagna caycar Tayta Diosman yäracurmi tsurin Josëpa tsurincunata bendicionninta gorgan. Nircurmi Tayta Diosta alabargan tucrunman tucnacuycular. ^s

²² Josëpis wanunanpagna caycar Tayta Diosman yäracurmi Israel runa mayincunata wilargan Tayta Diosnintsi yanapartin Egipto nacionpita yargapäcunanpag cashganta. Tsaymi paycunata caynog nergan: “Caypita aywacuna tulöcunatapis apacärinqui.” ^t

²³ Tayta Diosman yäracurmi Moisés yuriyauptin taytan y paman quimsa quillayag payta pacarätser-

gan. Tsaynog pacarätsergan Egipto nacioncho mandag faraón olgu wamracunata yuriylanta lapanta wanutsinanpag mandartinmi. Waquin wamracunapita Moisés más cuyaylapag cashganta ricaycurmi Diosman yäracärishpan tsaynog pacarätsergan. ^u

²⁴ Tayta Diosman yäracurmi Moisespis mandag faraonpa warmi tsurin ashmacuycaptinpis faraonpa wilcan cayta mana munargantsu. ²⁵ Tsaymi faraonpa wayincho imayca janancha cananpa trucanga Israel mayincunaman aywacorgan paycunawan nacanapag. ²⁶ Paycunawan nacargan Cristu-raycu nacashganpita gloriacho premiuta chasquinanpag cashganta musyarmi.

²⁷ Yäracurmi Moisesga Tayta Diosta ricaycagnogpis mandag faraonta mana mantsacuyta Israel mayincunata Egiptupita jorgorgan. ²⁸ Tayta Diosman yäracurmi Moisesga Israel runacunata nergan Pascuata rurar puncu quicionnincunata yawarwan lushinanpag. Tsaynog lushitsergan wanutsicog ángil yawarta ricaycur tsay wayicho guechpa cagta pitapis mana wanutsinapagmi. ^v

²⁹ Tayta Diosman yäracurmi Israel runacunapis Puca Lamarta tsaquilata pasapäcorgan. Egipto runacunami itsanga shengaypa wanupäcorgan Israel runacunata cutitsinanpag gupanta yaycushgancho. ^w

³⁰ Tayta Diosman yäracuptinmi Israel runacuna Jericó marcapa ganchis junag jiruruypa puriyauptin murällanpis juchorgan. ^x ³¹ Tayta Diosman yäracurmi püta Rahab warmipis ricapacog Israel runacunata pacargan

^p 11.17 Génesis 21.12; 22.1–19. ^q 11.18 Génesis 21.12. ^r 11.20 Génesis 27.27–40.

^s 11.21 Génesis 48.8–20. ^t 11.22 Génesis 50.24–25. ^u 11.23 Éxodo 1.15–22; 2.1–2.

^v 11.28 Éxodo 12.21–23. ^w 11.29 Éxodo 14.21–31. ^x 11.30 Josué 6.12–20.

marca mayincuna mana wanutsinanpag. Tsaynogpami Jericó marcaman yaycur tsaycho tag runacunata Israel runacuna wanutsirpis Rahabtaga mana wanutsergantsu.^y

³² Tayta Diosman waquin yäracushgannogmi Gedeonpis, Baracpis, Sansonpis, Jefeüpis, Davidpis, Samuelpis y Tayta Diosnintsipa waquin profëtan-cunapis yäracärishga.^z ³³ Tayta Diosman yäracogcunaga waquincuna vincipäcorgan chiquegnin nación runacunata, waquincuna Israel runa mayincunata ali juzgapäcorgan y waquincunami Tayta Diosnintsi promitishgancunatapis chasquipäcorgan. Waquincunataga leoncunapis manami micapäcorgantsu.³⁴ Waquincunataga ninapis manami rupargantsu. Waquincunami espädawan wanutsinanpag caycaptinpis gueshpicärergeran. Waquincunami chiquegnin soldäducuna tsaytsica caycaptinpis Tayta Diosman yäracur vincipäcorgan.³⁵ Tsaynoglami Tayta Diosman yäracog warmicunapis ricargan wanushga tsutaraycag wawancuna cawaritsimushganta.^a

Waquintanami Tayta Diosman yäracuycaptinpis nacatsiypa wanutsergan. Tayta Diosta nëgatsinan cashga tsaynog nacatsiptinpis Tayta Diosnintsi cawaritsimunanpag cashganta musyar paycunaga manami nëgar-gantsu.³⁶ Tsaynoglami waquincuna nacapäcorgan runacuna ashliptin, magaptin y carcilman wichgaptin.³⁷ Waquincunatami sagmaypa wanutsipäcorgan. Waquincunatami serruchuwan cutsuyapa wanutsipäcorgan. Waquincunatanami espädawan tucsiypa wanutsipäcorgan. Waquincunanimi pasaypa wactsa car uysha gara-

tsapita y cabra garatsapita röpanta jaticurcur may-tsaypapis puripäcorgan.³⁸ Tayta Diosnintsi munashgan-nog cawapäcushganpitami paycunata chiquipäcorgan. Tsaynog chiquishga carmi puricärergeran chunyag jircacunapa y machaycunacho pacacushpan. Tayta Diosman mana yäracogcunaga manami pipis paycunaman tincuntsu.

³⁹ Paycuna tsaynog nacarpis lapan shongunwan yäracushganpitami Tayta Diosnintsi cushicorgan. Salvadorta cachamunanpag Tayta Diosnintsi promitishganta shuyararpis tsay unay runacunaga wanupäcorgan Jesucristo manarag shamuptinmi.

⁴⁰ Cananmi itsanga Jesucristo mayna shamushgana. Jesucristo shamur cruzcho wanushganpitami paycunapis nogantsipis perdonashga caycantsi.

Mana ajayaypa Jesucristuman yäracunantsipag tantyatsicuy

12¹ Tsaynog atsca runacuna Tayta Diosnintsiman yäracushganta musyaycarga cörrinanpag guepinta cachaycognog nogantsipis lapan jutsa ruraycunata cacharishun. Nircorga Tayta Diosnintsiman yäracur pay munashgannog wanunantsiyag shumag cawashun.² Tayta Diosman tsaynog yäracur cawanantsipäga shumag tantyacushun salvamagnintsi Jesucristo imanog cawashgantapis. Payga gloriaman chayananpag cashganta musyarmi Tayta Dios munashgannog cawargan cruzcho nacar wanunanpag caycarpis. Tsaymi cananga cawarircamur Tayta Diospa derëchacag naupancho jamaraycan.³ Tsay-

^y 11.31 Josué 2.1–14; 6.22–25. ^z 11.32 Gedeón (Jueces 6–8); Barac (Jueces 4–5); Sansón (Jueces 13–16); Jefeü (Jueces 11.1–12.7). ^a 11.35 1 Reyes 17.17–24; 2 Reyes 4.25–37.

nog caycaptenga imapitapis nacar shumag tantyacäriy Jesucristupis nacashganta. Tsayta tantyacorga imanog nacarpis mana ajayaypami pay munashgannog cawashun.

⁴ Mayjina nacaptiquipis manami mayganiquitapis Diosman yäracushgayquipita wanutsishunquiragtsu. Tsaynog captinpis çimanirtag ichic-lata nacashpayqui guepaman cuticuyta munarcaycanqui? ⁵ Gamcunaga çgongaycushcanquicu Tayta Diosnintsi wamrancunapag palabrancho caynog niycashganta?

“Tayta Diosman yäracushgayquipita nacar ama jagayaytsu. Tsaypa trucanga tantyacuy Tayta Diosnintsi munaptin tsaynog nacaycashgayquita.

Tsay nacaycunawanmi pay corrigiyçäshunqui munashgannog cawanayquipag.

⁶ Tayta Diosnintsega cuyashgan wamrancunalatami tsaynog corrigin.”^b

⁷ Tayta Diospa palabrancho tsaynog niycaptenga nacarpis ama jagayaytsu. Wamran captiquimi tsay nacaycunawan jutsata rurashgayquipita Tayta Diosnintsi corrigiyçäshunqui. Wamrancuna çäsucog cananpag pï runapis corrigishgannogmi gamcunatapis Tayta Diosnintsi corrigiyçäshunqui pay munashgannog cawapäcunayquipag. ⁸ Mana corrigishuptiquega manami paypa wamrancunatsu caycanqui. Payga lapan wamrancunata corrigin pay munashgannog cawapäcunanpagmi.

⁹ Taytantsipis mana çäsucog cashgantsipitami corrigimantsi çäsucog canantsipag. Corrigimaptintsipis jagayänantsipa trucanga çäsucush-

cantsimi. Tsaynog caycaptenga çimanirtag mana çäsucushwantsu Tayta Diosnintsi corrigiyçämaptintsega?

¹⁰ Taytantsipis maquincho cashgantsiyaglami avëcis lutanta rurashgantsita yarpas castigamantsi. Tayta Diosnintsimi itsanga shumag tantyacuycur corrigimantsi pay munashgannog cawanantsipag. ¹¹ Corrigimaptintsi nacarpis ama jagayäshuntsu. Tayta Diosnintsi manami manacagpagtsu corrigimantsi, sinöga pay munashgannog cushishga cawanantsipagmi.

¹² Tsaynog caycaptenga, waugui-panicuna, nacaycuna çämuptin ama laquicuytsu. Laquicur jucag-yashga canayquipa trucanga Tayta Diosman waran waran yäracäriy.

¹³ Nacarpis tsaynog yäracäriyshgayquita ricacushushpayquimi waquin waugui-panicuna guepaman cuticushga carpis Tayta Diosta yapay sirvengapag.

Tayta Diosta mana wasguipänantsipag tantyatsicuy

¹⁴ Pï-maywanpis cuyanacur ali cawapäcuy. Tsaynogpis jutsata ama rurapäcuytsu. Jutsata rurar cawagcunaga manami pipis Tayta Diospa naupanman chayangatsu. ¹⁵ Tsaynog caycaptenga cuidädu chucru shonguyar jutsata rurapäcunquiman. Jutsata rurapäcuptiquega waquincunapis gamcunata ricacushushpayqui guepamanmi cutipäcongapag. Tsaynog canayquipa trucanga jucniqui jucniquipis shacyätsinacur cawapäcuy. ¹⁶ Cuidädu maygayquipis Esaünog Tayta Diosnintsi promitishgancunata manacagman churanquiman. Esaüga Isaacpa guechupa tsurin carmi chasquinan cargan

^b 12.6 Proverbios 3.11–12.

guechpa cashganpita bendicionta.^c Tsaynog captinpis pasaypa micanarmi tsay bendicionta juc plätü micuylapag wauguinta goycorgan.¹⁷ Nircurnami mayjina wagarpis papäninpita tsay bendicionta manana chasquergannatsu.^d

¹⁸ Nogantsega manami Sinaí jircaman chayagnogtsu caycantsi. Sinaí jircachöga Israel runacunawan Tayta Diosninti punta cag conträtuta rurapin ninapis, tsacaypis y fiyupa wayrapis corgan.^{19,20} Tsaynogلامي cornëtata tucamushganpis mayacämorgan. Nircurnami Tayta Dios mantsariypag parlamur caynog nergan: “Runapis uywapis jirca chaquilanmanpis witsag cäga sagmaypa wanutsishga catsun.”^e Tsayta mayarmi Israel runacuna pasaypa mantsarishpan Moiesta manacärrergan paylana Tayta Diosnintsiwan parlamunanpag.²¹ Pasaypa mantsariypag captinmi Moisespis nergan: “Nogäläpis pasaypami sicsicyaycä mantsarishpä.”^f

²² Nogantsega Sinaí jircaman chayagnog canantsipa trucanga gloriacho caycag Jerusalén marcaman chayagnogmi caycantsi. Tsaychömi yupaytapis mana atipaypag tsaytsica angilcuna Tayta Diosta cushishga alabar-caycan.²³ Tsaynogpis Tayta Diosman unaypita-patsa yäracogcunawan mayna juntacashganogmi caycantsi. Paycunapapis nogantsipapis jutintsi-cunaga libro de la vidachömi escribi-raycan. Tsaynogpis pï-mayta juzgag Tayta Diospa naupanman mayna chayashganognami caycantsi.²⁴ Jesucristupa naupanchöpis mayna caycagnognami caycantsi. Paymi wanorgan Tayta Dios mushog conträtuta rurar

salvamänantsipag. Yawarninta Abel^g jichashganga wanutsegnin maldicionädu cananpagmi corgan. Jesucristo wanur yawarninta jichashganmi itsanga jutsantsicunapita perdonashga canantsipag caycan.

²⁵ Tsaynog caycaptenga Tayta Diosnintsita ama wasguipäshuntsu. Wasguipaptintsega chunyang jircacho Moisés wilacushganta mana cäsucogcunata castigashgannogmi nogantsitapis Tayta Diosninti castigamäshun.²⁶ Tayta Diosninti Sinaí jircacho parlamupin tsay jircapis pasaypami sicsicyargan. Tsaynogلامي juicio final junag cay patsapis y jana patsapis sicsicyan-gapag. Tsaynog cananpag cashgantami Tayta Dios nimantsi.^h²⁷ Tsay junagmi mana cäsucuptintsega juzgamäshunpag. Payta cäsucuptintsimi itsanga naupanman pushamäshun imayyagpis cawanantsipag.

²⁸ Naupanman pushamänantsipag caycaptenga Tayta Diosta agradëcur lapan shonguntsiwan payta adorashun. Tsaynogpis paypa wilacuy-nintaga imaypis cäsucushun.²⁹ Mana cäsucogcunataga Tayta Diosninti rupaycag infernumanmi gaycongapag.

Tayta Dios munashgannog cawanantsipag tanyatsicuy

13¹ Jesucristuman yäracog mayintsiwan imaypis cuyanacäriy.² Tsaynogla wayiquiman pipis posädacog chämuptin posädatsinqui. Tsaynog posädatsishgancho waqin runacuna mana mushaycar angiltami posädatsergan.

³ Carcilcho caycag yäracog mayintsita ama gongapäcuytsu. Nacatsishup-

^c 12.16 Génesis 25.29–34. ^d 12.17 Génesis 27.1–40. ^e 12.19,20 Éxodo 19.13.

^f 12.21 Deuteronomio 9.19. ^g 12.24 Génesis 4.1–12. ^h 12.26 Hageo 2.6.

tiqui pilapis yanapashunayquita munashgayquinogla gamcunapis yäracog mayintsita nacatsiptin yanapanqui.

⁴ Majayog cagcuna majayquiwan cuyanacur ali cawapäcuy. Adulterio jutsata ama rurapäcuytsu. Tayta Diosnintsega juzgangami adulterio jutsata ruragcunata y majaynag caycar jucwan jucwan punucogcunata.

⁵ Tsaynogpis guellaylapäga ama wanupäcuytsu. Tsaypa trucanga gänashgalayquiwan contentacäriy. Ama gongapäcuytsu Tayta Diosnintsi caynog nishganta:

“Gamcunata imaypis mana cachaypami yanapashayqui. Tsaynogpis gamcunawanmi imaypis caycäshag.”ⁱ

⁶ Mastapis Tayta Diospa palabrancho caynogmi niycan:

“Tayta Dios imaypis yanapaycämaptenga manami imatapis mantsacötsu. Runacuna nacatsimaptinpis Tayta Diosmanmi imaypis yäracushag.”^j

⁷ Jesucristupa wilacuyninta yachatsishogniquicuna Jesucristuman yäracur cawashgannog gamcunapis payman yäracur cawapäcuy.

⁸ Jesucristoga unay cashgannoglamani cananpis y imayyagpis munayniyog caycanga. ^{9,10} Wilacuyninpis tsaynoglamini imayyagpis caycan. Tsaynog caycaptenga ama chasquipäcuytsu lutan yachatsicogcuna yachatsishganta. Waquin runacunaga caynog nirmi lutanta yacharcaycätsin: “Jerusalén altarcho uywacunata rupatsir fiestata ruraptin gamcunapis marcayquicunacho juntacaycur fiestata rurapäcuy. Fiestata rurar micuptiquimi Tayta Diosnintsi perdonashunqui jutsa

rurashgayquita.” Tsaynog nir yachatsishuqtiqui ama chasquipaytsu. Tayta Diosnintsega perdonamantsi Jesucristuta chasquicushgantsipitami, manami fiestata rurar micuyta micushgantsipitatsu o uywacunata altarcho rupatsishgantsipitatsu. Tsaynog ruraptinrag Tayta Dios perdonanapag cashganta yarpagcunaga manami salvashgatsucangapag.

¹¹ Unay cag conträtuchöga mandag cüracunapis uywacunata pishtarcur yawarnilantami Lugar Santísimuman yaycatseg. Tsaychömi Tayta Diosta manacäreg runacuna jutsata rurashganpita perdonashga cananpag. Nircur tsay uywacunapa aytsantaga tashgan marcapita jorgurirmi rupatsipäcog. ¹² Tsaynoglamini Jesucristutapis marcapita jorgurcur crucificaypa wanutsipäcorgan. Yawarninta jichar tsaynog wanushganpitami jutsantsicunata Tayta Diosnintsi perdonamantsi. ¹³ Jesucristo tsaynog nacaycaptenga nogantsipis pay nacashgannog nacarpis o payta jamurpashgannog jamurpämaptintsipis paylamani imaypis yäracushun. ¹⁴ Nogantsega cay patsacho gorpanoglamini caycantsi. Tsaymi gloria marcaman chayanantsipag cagta shuyaraycantsi. ¹⁵ Tsaynog caycaptenga Jesucristuman yäracur Tayta Diosnintsita imay hörapis lapan shongunsiwan alabayculäshun. ¹⁶ Tsaynogpis mana gongaypa jucniqui jucniqui imalawanpis yanapanacuy. Tsaynog yanapanacur cawaptintsimi Tayta Diosnintsi cushicun.

¹⁷ Mayor wauguicuna yätsishushgayquita cäsucäriy. Tayta Diosta cuentata gonanpag cashganta musyarmi paycuna gamcunapag waran

ⁱ 13.5 Deuteronomio 31.6,8. ^j 13.6 Salmo 118.6.

waran yarpachacuycan shumag rica-shunayquipag. Tsaynog caycaptenga shacya shacyala yachatsishunayquipag chasquicäriy. Mana chasquicup-tiquega manacaglapagmi yachatsishushgayquipis caycan.

¹⁸ Tayta Diosnintsita manacäriy pay munashgannog imaypis cawapä-cunäpag. ¹⁹ Tsaynogpis payta manacäriy gamcunaman yapay cutimunäpag.

Carta ushanan

^{20,21} Ali cawayta gomagnintsi Tayta Diosnintsi imaypis yanapaycushunqui jutsata mana ruraypa pay munashgannog cawapäcunayquipag. Tsaynog cawanantsipagmi Jesucristo yawar-ninta jichar cruzcho wanorgan. Pay wanushgan hörämi Tayta Diosnintsi nogantsiwan conträtuta rurashga jutsantsicunata perdonamänantsipag.

Wanushganpitami Jesucristuta Tayta Diosnintsi cawaritsimushga. Tsaymi cananga Jesucristo shumag ricaycämantsi uyshancunata mitsicog runa ricashgannog. Tsaynog cashganpita imayyagpis Jesucristo alabashga cay-culätsun. Amén.

²² Waugui-panicuna, shumag yachacunayquita munarmi walcalatapis cay cartacho yätsimushcä. ²³ Wauguintsi Timoteupis carcilpita yargamushganami. Gamcunaman manarag shamuptë pay chämuptenga ishcanëmi shamushagpag.

²⁴ Salüdöta goyculanqui Jesucristupa wilacuyninta wilacogcunata y lapan waugui-panicunatapis. Italia nacionpita cag waugui-panicunapis salüdunta gamcunapag apatsicamun.

²⁵ Tayta Diosnintsi cuyapar yanapayculäshunqui ali cawapäcunayquipag. [Amén.]